

BUNITA

NA PALAOÁN GI

TIPÓ'



TRIAL VERSION

IN NISISITA I OPINION-MIYU

*retold by:  
dolores marciano*

*illustrated by:  
joy goodenow*



These pilot materials were produced pursuant to a Grant from the U.S. Office of Education, Department of Health, Education and Welfare. However, the opinions expressed herein do not necessarily reflect the positions or policy of the U.S. Office of Education, and no official endorsement by the U.S. Office of Education should be inferred.

This preliminary publication was produced with funds provided by the Bilingual Education Act, Title VII of the Elementary and Secondary Education Act of 1965, as amended by Public Law 93-380.

Produced By  
PACIFIC AREA LANGUAGES MATERIALS DEVELOPMENT CENTER  
SOCIAL SCIENCE RESEARCH INSTITUTE  
2424 Maile Way, Porteus 713, University of Hawaii at Manoa  
Honolulu, Hawaii 96822

MAY '79


Un puengi humuyong si Rhonda yan si Timonti para u efresco i dos gi sanhiyong i gima'-ñiha anai gaige i bankon anakko' gi papa' i trokon talisai. Gualafon guihi na puengi, sumen klaru yan sumen ma'lak i ininan i pilan papa' gi tano'. Sumen fresko lokkue' i guinaifen i mangglo' ya siña ha' mahungok i kinalamten i hagon na mangalalamten kada mangguafi i mangglo'.

Ti apmam mahungok na sumaga un kareta gi me'nan i gima'-ñiha. Masiente lokkue' anai mamomokkat hulo' gi gua'ot i taotao ya duru di manya'u.

"Oi - Oi! Timonti, Timonti." Duru este i taotao di umessalao ginen i pettan sanme'na.

Humanao si Timonti ya ha espiha i taotao ni manyaya'u gi pettan sanme'na. Nina'sen magof anai ha l'i'e' na i amigon-ñiha as Juan i manyaya'u gi petta. Ha kombida tatto para u fañiha manmata'chong gi papa' i tronkon talisai. Sumen na'magof guihi na mumento sa' duru i tres di mahasso tatto i tiempon-ñiha gi anai manhohoben siha gi eskuela. Duru lokkue' di ma'estoria i inegga-ñiñiha na programa anai sesso siha manhanao ni tres.

Mientras manestotoria i tres, buente esta dos oras na tiempo maloffan, mahungok i ga'lagu siha gi kanton i tipo' anai mansen la'la' i flores asmin ni mansen paopao na duru di manhaohao, duru di manatborutao kulang



2.

ayu na klasen kati i guaha mohon para u matai. Ayu na klasen kati i sen na'ma'añao ya esta hana'fanfufugu i tataotao-mu yanggen un hungok.

Ensigidas mampara i tres yan i estorian-ñiha yan manmamakkilu. Ma'a'atan ha' guatu ayu na lugat anai mahuhungok i katen i ga'lagu siha. Gotpe ha' lokkue' humomhom i tano' anai tinampe i pilan nu i mapagahes ya sumilensisio i puengi. Ayu ha mahuhungok i hinahngon-ñiha yan i kinalamten i hagon siha gi hilo' tronkon talisai anai mangguaguaifi i mangglo'. Esta i tres mansen ma'añao lao manmatata'chong ha' guihi ya ni unu gi entre i tres kumalalamten ginen i fata'chong-ñiha.

Pa'go ha kahulo' si Rhonda para u halom gi halom i gima-ñiha ha tugon ensigidas guatu ya ha toktok si Timonti sa' gotpe ha' sumen paopao i urian-ñiha. Mampos mangge' na paopao ayu i mangginginge'. Esta i tres mas manma'añao lao ni unu gi entre i tres kumalalamten sa' kulang mohon esta manchetton i tataotao-ñiha gi hilo' i banko.

Kada mangguafi i mangglo' mas paopao yan metgot i ninginge'-ñiñiha esta ti siña ma'-eksplika este i sineseden-ñiñiha. O'oppaan este na paopao magi ginen i tipo' anai gaige siha i flores gi hatdin. Anai esta guaha kasi ennao i kinse minutos malaffan ha li'e' si Juan na palao'an na matata'chong gi kanton

3.



i tipo' ya chinachatge gue'. Esta si Juan kulang mohon manli'e' birak i pusision-na. Kulang mumalingu i taotao i hinasso-ña sa' ha a'atan ha' i tipo' ya sigi di ha tancho' guatu nu i kannai-ña. Ma bira siha si Timonti yan si Rhonda pot para u ma'aligao hafa tinanchocco-ña lao ni hafafa i dos lini'e'-ñiñiha. Duru si Juan umessalao ya di ha tatanco' guatu i tipo' na direksion. Uttimo-ña duru di umessalao ya duru di ha yeng-yong i ilu-na pues sigi di ilek-ña.

"Mungo yo', munga yo'. Ai ayuda yo' pot fabot, sangani ya u sigi ha' na maisa. Munga yo' tumattiyi gue'.

Kahulo' si Timonti pot para u na'kontento si Juan yan i sinente-ña, ha keke'na'famatkilu i amigu-ña sa' kulang esta mohon bumaba i ilu-ña lao kana' ha' ni hafafa siña ha cho'gue sa' sigi ha si Juan umessalao yan ha ripipiti ha' i fino'-na, na ti para u hanao ya u tattiyi i uma'agang gue'.

Ha hasso si Rhonda na guaha patma bendita gi halom i gima'-ñiha. Buente manlili'e' si Juan birak. Ha hasso lokkue' si Rhonda na sesso si Nana-ña ha hungok na maolek i patma bendita para umasongge yanggen guaha taiguini na sinesedi. Malagu halom gi gima'-ñiha ya mañongge patma bendita. Sigi i palao'an di lumilikoyan i patma bendita gi kannai-ña. Ha lilikoi'i finene'na si Juan pues mamokkat gi



uriyan i banko. Ha liliko'i lokkue' i tronkon talisai estaki esta pururu ha' asu un lili'e' ginen i ason i patma bendita.

Anai maripara na kulang pumarannaihon si Juan yan i atborutu-na, mapipet halom esta i gima'-niha ya mana'fata'chong.

"John! John! kao esta amigu maolek i sinente-mu? Sina un sangani ham hafa linie'-mu guihi huyong? Finaisen as Timonti.

"Ekkua' nai Tim, Kao bai hu ta'lo mata'-chong guenao huyong gi papa' talisai an puengi lao masga yo'! Ti hu nanangga na para bai hu susedi ta'lo este na klasen eksperensia. Estaba este i palao'an na matata'chong gi hilo' i tipo' ya ha titife' i flores asmin siha. Ni un biah i nai manli'e' yo bunitan palao'an. Sen anakko' yan sen attilong i kulot gapotulu-ña ya gof chomchom i mulata-ña kulang ha' i napu i mulatan i gapotulu-ña. Bunita i figurana fasu-ña. Kulang mohon ti hutungo' hafa taimanu para bai hu sangani hamyo yan hafa taimanu para u eksplikayi hamyo pot i lini'e'-hu lao me'nan, sumen bunita i lini'e'-hu na palaoan. Chumininina ni kulot a'paka na magagu ya puru ha' leis i sanme'nan i chinina-ña. Ai kulang un nobia mohon i pusision-ña guihi na mumento anai hu a'atan. Guaha lokkue' un flores rusat ni kulot a'paka na ha pepega gi umbandan i ilu-ña. Ayu yo' mas muna'ma'a'-ña o i ha a'agang yo' pot para bai hu tatti-

yi gue'. Duchumas manhihita na tres ya guahu ha' lumili'e'. Mampos na'ma'añao este na siente sa' ha estitira i dos kannai-ña pot para bai hu tattiyi gue'. Ai! Yanggen hu tattiyi ekkua hafa para hu susedi" ilek-ña si Juan.

"Maolek ha' nai na manggaige ham sino ekkua hafa para humuyong-mu." Ilek-ña si Timonti.

"Kao ti in fanenestotba yanggen sumaga yo' guini esta agupa'? Maskinunka yo' humanao na maisa tatte gi gima-hu!" Ilek-ña si Juan.

Magahet na sumaga ha' si Juan guihi na puengi gi gima i amigu-ña yan i asaguan i Amigu-ña.

